

Hefðum átt að byggja upp í fyrri bylgjum

„Núna eigum við að vera nýkomin úr sumarfrí, full af orku fyrir veturinn. Það er ekki raunin á Landspítala við Hringbraut,“ segir Tómas Guðbjartsson hjartaskurðlæknir við *Læknablaðið*. Álagið á Landspítala sé viðvarandi.

■■■ Gunnhildur Arna Gunnarsdóttir



Tómas Guðbjartsson

„Ég tjái mig fyrir hönd skjólstæðinga minna, hjartasjúklinga, sem þurfa á gjörgæsluplássunum að halda. Sem betur fer hefur ekki verið mikið um bráð tilfelli undanfarið. En þegar þau verða sjá-

um við hvernig gjörgæslan er full upp í rjáfur,“ segir Tómas hjartalæknir á Landspítala. Lýsandi fyrir alvarleika stöðunnar sé þegar sjúklingar í lífshættu séu fluttir milli sjúkrahúsa. „Og jafnvel til útlanda í sjúkraflugi,“ segir hann.

„Það vantar starfsfólk. Nóg er af fólki, eins og hjúkrunarfræðingum, sem vildi vinna á spítalanum í upphafi faraldursins en er nú horfið á braut. Við hefðum átt að nýta meðbyrinn með spítalanum í fyrri bylgjum. Hann er ekki til staðar nú enda ekki verið haldið rétt á spilum gagnvart starfsfólkinu.“

Tómas ritaði færslu á Facebook um miðjan ágústmánuð þar sem hann líkti Landspítala við skip án björgunarbáta fyrir alla. Hann var í kjölfarið í viðtali í Síðdegisútvarpi Rásar 2 og í Bítinu á Bylgjunni. Í Facebook-færslunni gagnrýndi hann leiðara stóru dagblaðanna sem kölluðu eftir slaka í sóttvarnaáðgerðum. „Spítalinn þolir það ekki.“

Um miðjan ágúst var Landspítali á hættustigi og bráðamóttakan við þolmörk. Sjúklingur af gjörgæslu hafði verið sendur á gjörgæslu til Akureyrar og sagt var frá því að Heilbrigðisstofnun Suðurlands myndi bæta við 10-15 rúmum til að taka við fólki af Landspítala. Starfsmenn Klíníkurinnar í Ármúla væru einnig fengnir tímabundið til að létta á álagi bráðamóttökunnar.

Tómas segir að hann telji skyldu sína að greina frá ástandinu. Það hafi hann hins vegar ekki gert lengi. „Ég var áberandi í baráttu Landspítala fyrir auknu fé þegar ég kom heim til starfa. Mér fannst ákallið



ekki skila neinu, var svekktur og fannst því tími kominn á aðra að taka slaginn,“ segir hann um ástæðu færslunnar núna. Hún kemur í kjölfar upphlaups eftir að almannatengill spítalans bað lækna um að beina fjölmiðlum til sín. Hann baðst síðar afsökunar á því.

„Mörgum fannst þessi e-mail samskipti ekki hvetjandi en þau blésu mér eldmóði í brjóst. Það sem er mikilvægt er að hafa opin samskipti og segja frá ástandi sem er alvarlegt,“ segir Tómas.

„Í kjölfar færslunnar fékk ég hvatningu innanhúss. Líka frá stjórnendum spítalans, sem ég átti ekki von á,“ segir hann.

Covid-faraldurinn hefur breytt starfsemi spítalans til mikilla muna. Hér má sjá hvernig sjúkrahúsið er lokað af með límbandi. Mynd/Tómas

„Ég var áberandi í baráttu Landspítala fyrir auknu fé þegar ég kom heim til starfa. Mér fannst ákallið ekki skila neinu, var svekktur og fannst því tími kominn á aðra að taka slaginn,“

Fagráð Landspítala vill sjá ríkið bregðast við



Marta Jóns Hjördísardóttir
Mynd/Borkell

„Fagráð Landspítala skorar á stjórnvöld að gera það sem þarf til að heilbrigðiskerfið, með Landspítala í fararbroddi, sé eftirsóttur vinnustaður þar sem veitt sé besta heilbrigðisþjónusta sem völ er á hverju sinni,“ segir Marta Jóns Hjördísardóttir formaður ráðsins fyrir hönd þess í yfirlýsingu sem ráðið sendi frá sér í ágústmánuði.

„Það þýðir ekki að hika lengur, búið er að benda á vandann í mörg ár, nú sem aldrei fyrr er tækifæri til úrbóta,“ segir í ályktuninni.



Mynd/Ólafur Magnússon

Slá saman í átakið „Sem betur fer“

Læknafélag Íslands, Félag íslenskra hjúkrunarfræðinga og BHM hafa tekið höndum saman og blása til átaks. Það nefnist „Sem betur fer“ og var hleypt af stokkunum seinni hluta ágústmánaðar. Reynir Arngrímsson, formaður Læknafélagsins, segir átakið eitt það stærsta sem félagið hefur ráðist í. „Markmiðið er að sýna mikilvægi heilbrigð-

isstarfsmanna og framlags þeirra fyrir samfélagið nú þegar teygist á COVID-heimsfaraldrinum.“ Myndin var tekin á bakvið tjöldin, þegar fulltrúar félaganna stilltu sér upp fyrir myndatöku herferðarinnar. Hér standa lækarnir Jóhanna Ósk Jensdóttir og Indriði Einar Reynisson fyrir framan vélna.

Fá Ágúst Inga til að leysa leghálssýnavandann

„Sem betur fer lærir fólk af reynslunni. Við munum ekki segja upp samningum við Danmörku fyrr en allt er farið að rúlla rétt hér heima. Það eru allir sammála um það,“ segir Ágúst Ingi Ágústsson sem nú hefur tekið við stöðunni sem Kristján Oddsson gegndi hjá Samhæfingarstöð krabbameinsskímanna hjá Heilsugæslu höfuðborgarsvæðisins.

„Þetta leggst vel í mig,“ segir Ágúst Ingi, sem er fyrrum sviðsstjóri Leitarstöðvar Krabbameinsfélagsins. Spurður hvort hann líti á ráðninguna sem traustyfirlýsingu til fyrri verka svarar hann: „Ég myndi segja ósatt ef ég segist ekki líta svo á. En ég veit líka að það er ekki mörgum til að dreifa sem að hafa reynslu til að stýra verkinu.“

Margt hefur farið úrskaiðis í ferlinu frá því að skimanir og greining voru færð frá Krabbameinsfélaginu um áramót til Heilsugæslu höfuðborgarsvæðisins. Konur hafa beðið mánuðum saman eftir niðurstöðum rannsókna á leghálssýnum sínum frá Danmörku. Stefnt er að því að

Landspítali sjái um þær í framtíðinni og undirbúningur þess hafinn. Í tilkynningu Heilsugæslu höfuðborgarsvæðisins er miðað við áramót.

Ágúst segir konur nú geta vænst styttri biðtíma eftir svörum. „Ég held að við getum sagt að við séum komin yfir versta hjallann,“ segir hann.

„Við gerum nú allt til að koma ferlinu í viðunandi ástand. Heilsugæslan er metnaðarfull fyrir verkefninu og vill að þetta gangi vel,“ segir hann. „Ég geri mér grein fyrir því að verkefnið er feiknarstórt og flókið, þræðirnir eru margir. Þetta verður mikil vinna en það róar mig að ég hef á



Ágúst Ingi Ágústsson hefur tekið við Samhæfingastöð krabbameinsskímanna en hann var áður hjá Leitarstöð Krabbameinsfélagsins þar sem skimanir og greiningar voru áður gerðar. Mynd/gag

tilfinningunni að allir leggst á eitt að koma því í réttan farveg.“

Ágúst er ráðinn til verksins í 6 mánuði. „Svo verður framtíðin að leiða í ljós hvað verður.“ - gag